



1ERE SESSION ORDINAIRE POUR 2018
PRIMA SESSIONE URDINARIA DI U 2018

REUNION DES 26 ET 27 AVRIL
RIUNIONE DI I 26 E 27 D'APRILE

2018/O1/026

*Question déposée par Mme Anne TOMASI
Au nom du Groupe « FEMU A CORSICA »*

OBJET : Furmazione Prufeziunale.

Madama a Cunsigliera in carica di a furmazione,

A riforma nant'à a furmazione prufeziunale hà fattu nasce un prugettu di lege dettu « pour la liberté de choisir son avenir professionnel ». Da novembre 2017 in quà s'hè messu in ballu un travagliu di concertazione trà i sfarenti attori in associu cù e regione postu ch'elle sò competente in stu duminiu.

Dapoi e lege di decentralizzazione di l'83, a cullettività s'hè impignata assai sopr'à tuttu per via d'ottobre 2017 di u CPRDFOP. Stu pianu stabbilisce l'assi cardinali da seguità, l'ogettivi da tuccà è l'azione da mette in opera. Attempu, u SRDE2I di 2016 face risorte a necessità d'una furmazione in leia cù u sviluppu economicu di l'isula.

O Madama a Cunsigliera, stu prugettu novu di lege prevede di fà currispone furmazione è bisogni di l'imprese. L'ogettivu ci pare onorevule chì face a leia trà i dispositivi di furmazione è a realtà suciale è economica, ma ci pare quantunque ch'ellu ci caccia a nostra competenza. In più di quessa, aldilà di stu scambiamentu di pulitica, ci serà dinò un scambiamentu in l'attribbuzione di i finanziamenti. Tamante incertezze !

In stu cuntestu, vidimu una manumessa di u Statu nant'à a furmazione prufeziunale, è di pensà ch'ella possi tene a Corsica una piazza secundaria, à noi ci ghjunghje u penseru.

L'amparera ùn hà manc'ella una piazza di prima trinca. I diplomi seranu scritti da u Statu è e rambule prufeziunale. A Cullettività di Corsica ùn serà più in carica di u schema regionale di a furmazione prufeziunale in alternanza è ùn la ci ferà più à assicurà a complementarità trà i CFA è i licei prufeziunali. Ci dumandemu noi qualessa serà a piazza di l'imprese corse in un dispositivu naziunale quand'è ch'è no sapemu chì quì, sò pè a maiò parte TPE è ancu imprese persunale.

D'una antra parte, i finanziamenti seranu dati in funzione di i cuntratti d'amparera. Per cumpensà sta scelta d'una uguaglià tremenda ch'è si ferà in preghjudiziu di l'ugualità di i territorii, e regione s'anu da sparte 250 milioni d'euri per addebbulisce e sfracenze trà i CFA poveri di u rurale o di i quartieri citatini svarurizati è i centri più ricchi ch'è anu più ampARENTI.

Nant'à i 400 000 ampARENTI in Francia, in Corsica ùn ci n'hè chè 2000. Noi pensemu ch'ellu ci toccherà pocu è nunda è simu impensuriti per l'avvene di l'8 CFA di l'isula.

Per compie, ancu s'è no simu piuttosto sutisfatti di vede ch'è a cumpetenza « urientazione » tocca avà à e regione, a riescita di a missione ci pare ch'ella ùn venerà micca faciule s'elli ci mancanu l'arnesi : ùn seremu micca prisenti à a cumissione di u CREFOP è l'azione di cuurdinazione impiecu, urientazione, furmazione trà u Statu è a regione serà smarrita.

Madama a cunsigliera, vistu stu custatu oscuru, ùn seria ora è tempu di dì ch'ella ùn hè accettevule a situazione prevista, è di piglià una resoluzione per dumandà di manera sulenna ch'elle sianu di più assuciate e regione à u dispusitivu ? Ùn tricheria micca l'ora d'esse sicuri d'esse intesi è d'avè i mezi per mette in ballu e primure di u CPRDFOP, e nostre primure per una furmazione prufeziunale à prò di u populu corsu ?